

Powšitkowne WOZJEWJENJA

njedźelu, 5. februara 2012

Dźiwadłowa hra wo zbóžnym Alojsu

Němskorěčnu dźiwadłowu hru „Wende Andritzki“ předstaja młodostni z třoch wosadow składnostnje přenjeho wopomnjenskeho dnja zbóžneho Alojsa Andrickeho tutu njedźelu, 5. februara, w 16 hodž. w Chróšćanskej cyrkwi. Hru spisał je z Pólskeje pochodzacy kapłan Adam Ryszard Prokop, kotryž skutkuje tuchwilu w Gerje. Prapremjera hry bě w předpolu zbóžnoprajenja Ioni 11. junija w Drježdžanach.

Serbske kemše w Drježdžanach

Serbja, jich přiwuzni a přećeljo su wutrobnje přeprošeni na serbske kemše tutu njedźelu 5. februara, w 17 hodž. do cyrkwe swjateho Antonija w Drježdžanach Löbtau, Bünauska dróha 10. Božu mšu woswjeći farar Achim Pjetaš k česći zbóžneho Alojsa Andrickeho. Po kemšach zetkamy so na bjesadu. M. Bubnerjec

Patronatne kemše TCM

Towarstwo Cyrila a Metoda z.t. (TCM) přeprošuje wšitkich wěriwych na swjedženju swjateju Cyrila a Metoda wutoru, 14. februara, na patronatnu Božu mšu do Baćonja. Kemše započnu so w 19 hodž.

Kubłanski dzeń za 1. a 2. lětnik

Dekanatne dušepastyrstwo přeprošuje šulerki a šulerjow 1. a 2. lětnika štwórtk, 23. februara, wot 9 do 15 hodž. na kubłanski dzeń pod temu „Nowy spočatk“ do Don Boskoweho domu we Worklecach. Zajimcy njech so prošu hač do štwórtka, 16. februara, pod telefonowym čisłom (03 57 96) 8 87 07 we Worklecach přizjewja. Za wudawki dnja zhromadzi so wot kóždeho wobdźělnika přinošk we wysokosći třoch eurow.

Zhromadne posćenje

Sonja Hrjehorjowa poskičuje tež lětsa w Sulšecach zhromadne dny posćenja. Prěni kurs – přewažnje němsce – započnje so srjedu, 22. februara, a skónči so njedźelu, 26. februara, z lamajom posćenja. Druhi kurs – přewažnje serbsce – budže wot njedzele, 4. měrca, hač do soboty, 10. měrca. A třeći kurs – wosebje za muži – budže wot soboty, 17. měrca, hač do soboty, 24. měrca. Bliše informacije ke kursam dóstanu zajimowani na informaciskim wječorku z přednoškom wo posćenju a jeho formach, kotryž budže srjedu, 15. februara, w 19 hodž. w Sulšecach, čisło 42. Naprašowanja a přizjewjenja su móžne pola Sonje Hrjehorjoweje, Sulšecy 42, 02997 Kulow, telefonowe čisło (03 57 25) 7 05 60.

Přidatny seminar mandželstwa

Dekanatne dušepastyrstwo młodžiny zarjadowuje pjatk a sobotu, 30. a 31. měrca, přidatny seminar mandželstwa. Tutón wotměje so w farskej wikariji w Pančicach Kukowje. Zajimcy měli so jenož pisomnje přizjewić, pak z listom na adresu Dekanatne dušepastyrstwo młodžiny, Młynski puć 2, 01920 Worklecy, abo na faxowe čisło (03 57 96) 8 87 07. Dotal planowanej seminaraj mandželstwa w februaru a měrcu stej hižo wuceženej.

Za ministrantki a ministrantow 8. a 9. lětnika

Prózdniške dny w Zakopanym

Towarstwo Cyrila a Metoda (TCM) přewjedže za ministrantki a ministrantow tuchwilneho 8. a 9. lětnika, kotřiž aktiwnje k wołtarjej słuža, prózdniške dny w Pólskej. Tutón dowol ma wot štwórtka do soboty, 9. do 18. awgusta, w měsće Zakopanym we Wysokich Tatrach być. Wšitke ministrantki a wšitcy ministranća mjenowaneje starobneje skupiny su k tomu wutrobnje přeprošeni.

Budžemy pućować a so w přirodže Wysokich Tatrow wočerstwjeć. Pojědzemy wězo tež do bliskeho Krakowa, zo bychmy sej Wawel, Rynek a Wieliczku wobhladali. Dyrdomdejski budže zawěsće wulět do Słowakskeje, hdžež wočakuje was jězba na splawach.

Financowanje tutech dżesać dnjow je sčěhowace: Starši měli na ministrantku abo ministranta 160 eurow zapłaćić. Darićel wjetšeje sumy, TCM, wosady a Założba za serbski lud prózdniški projekt podpěraja. Z tym su transport, přenocowanje, zastaranje, wšitke wulěty a zastupy zaručene.

Lube ministrantki a lubi ministranća, přizjewće so prošu hač do pónđzele, 13. februara, w redakciji Katolskeho Posoła, telefonowe čisło (0 35 91) 55 02 12 abo z mailku na Katolski@Posol.de.

Wočakuja was woprawdže wotměnjace a wočerstwjeće dny.

Jurij Špitank, předsyda TCM